



ATASSUT INATSIARTUNI

ATASSUT

Gerhardt Petersen

UKA 2013/57 & 61-1

01.10.2013

Innuttaasut amerliartortut imigassartorpallaarnerup kinguneranik qaratsaminnut ajoquteqalersimasut inuiaqatigiinnit ikiorneqarnerunissaannut nassuiaatitalerlugu angusassamik toraagalimmik iliuusissanut pilersaarusoqqullugit Naalakkersuisut sanaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Iliuusissanut pilersaarut saqqummiuteqquneqarpoq kingusinnerpaamik Inatsisartut 2014-mi upernaakkut ataatsimiinneranni, imm. 57.

(Inatsisartunut ilaasortaq Agathe Fontain, Inuit Ataqtigiit)

Aamma

Innuttaasut imigassamik ajornartorsiutillit taassuminngalu qaangiinarlutik katsorsartikkumasut nammineq akiliinatik katsorsartittarnissaannik aqutissiuussinissamik iliuusissanullu pilersaarummik kingusinnerpaamik Inatsisartut 2014-imi upernaakkut ataatsimiinnissaannut saqqummiunneqartussamik Naalakkersuisut peqquneqarnissaannik Inatsisartut aalajangiiffigisassaattut siunnersuut, imm. 61.

(Inatsisartunut ilaasortaq Mimi Karlsen, Inuit Ataqtigiit)

Inuit Ataqtigiit sinnerlugit Inatsisartuni ilaasortat Agathe Fontain aamma Mimi Karlsen imigassamik aalakoornartortalimmik ajornartorsiuteqartut ikiorserneqartarnerannik pitsannorsaansamik siunertaqarlutik siunnersuutaat assigiinngitsut ATASSUT-mit ataatsimoortumik malitsigiinnarmillu oqaaseqarfigissavagut.

Siullermik siunnersuuteqartut qutsavigissavagut inuiaqatigiittut ineriartorniarnitsinni ajornartorsiutitta qiterisaasa annersaasalu ilaat matumani assigiinngitsutigut Inatsisartunit isummorsorfigineqarlutillu qaqilerivigineqarsinnaanissaannut periarfissiimmata.



ATASSUT INATSIARTUNI

Qanorluunniimmi saatikkaluarutsigu, nipituumik ersarissumillu nassuerutigereerparput inuiaqatigiittut nukittuumik ingerlaqqinniarnitsinni imigassamik aalakoornartortalimmik innuttaasut akornatsinni ajornartorsiuteqartut amerlassusitsinnut sanilliullugu amerlavallaarujussuautut, tamannalu pilertortumik, sunniutilimmik taamaattorli aamma peqqissaartumik isumatusaartumillu sulissuteqarnikkut annikillisarneqartariaqartoq ATASSUT-mit isumaqarpugut.

Inatsisartuni ilaasortaq Agathe Fontain siunnersuuteqarpoq innuttaasut amerliartortut imigassartorpallaarnerup kinguneranik qaratsaminnut ajoquteqalersimasut inuiaqatigiinnit ikiorneqarnerunissaannut nassuiaatitalerlugu angusassamik toraagalimmik iliuusissanut pilersarusioqullugit Naalackersuisut peqquneqassasut.

Siunnersuuteqartoq ajoraluartumik ilumoorpoq, innuttaasut akornatsinni aalakoornartortalimmik imigassartorpallaarsimallutik innuttaaqativut allaat ukioqqortunnigikkaluartut qaratsamikkut ajoquteqalersimasut kisitsisitalinngikkaluarlugit amerliartortutut oqaatigineqartariaqarput, aamma ilumoorpoq taakku immikkut iliuuseqarfigineqarnissaat pisariaqarluinnartoq.

Pingaartumik imminnut paarisinnaajunnaarsimasut sumiiffissaarunnerisigut utoqqartavut toqqissillutik eqqissisimasunillu avatangiiseqarlutik utoqqaat illuiniinniartussaagaluartut aalakoornartortalimmik imigassartorpallaarnermikkut qaratsamikkut innarluuteqalersimasut illoqatigisariaqartarpaat amerlasuutigullu sulisussatigut nukissat ilaannakuugaluartut taakkunaniitinneqartarlutik.

Tamanna iliuuseqarfigineqartariaqarpoq, ATASSUT-millu iluarisimaakkatsinnik Naalakkesuisooqatigiinnermi isumaqatigiissutitsinni utoqqartatta avatangiiserissarneqarnissaat sulissutigineqassasoq isumaqatigiissutaavoq, naammagisimaarparpullu sanaartornissamut pilersaarutit suliaralugit aallartinneqarsimmamata, naatsorsuutigilluinnarparpullu siunnersuuteqartup matumani ujartugai pingaartillugit pilersarusiornermi ilanngunneqarumaartut.



ATASSUT INATSIARTUNI

Inatsisartuni ilaasortap Mimi Karlsen-ip siunnersuutaa, innuttaasut akileeqqaarnatik katsorsarneqarsinnaanissaminnut periarfissinneqarnissaannik siunertalik ATASSUT-mit tapersorsorparput, taamaattorli aamma mianerisassaavoq akeqanngitsumik katsorsartissinnaanissaq imeq kuuginnartutut atorneqartussaannartutut isigineqalinnginnissaa.

Imatut paasillugu: Innuttaasut namminneq inuunermittut akisussaassuseqarnerat sutigit tamatigit mianerineqartariaqarpoq, innuttaasut immittut akisussaaffigigaluartut akeqanngitsumik killeqanngitsumillu sullinneqarnissaannik neqeroorfigineqarnerisigit akisussaaffiannik arsaartulertoorsinnaavagut, tamannalu inuiaqatigiittut nukittorsaatiginaviangilarput.

Taamatulli erseqqissaateqareerluta takulluarsinnaavarput aamma paasilluarsinnaavarput pingaartumik ilaqutariit meerartallit aalakoornartumik imigassartornermik ajornartorsiuteqartut, taamaalillutillu aamma isumaginnikkut ajornartorsiuteqartut pilertortumik piaartumillu ikiorserneqartarnissaat pisariaqartoq.

Taamaammatt siunnersuuteqartunut Naalakkersuisut naapitseriarnerat, tassalu ilaqutariinnut meerartallit aaqqissuussinermi sallinneqarnissaannik imaqartoq ATASSUT-mit tamakkiisumik tapersorsorparput.

Aaqqissorluagaasariaqarporli, tassami ullumikkut ajornartorsiutaalluinnartut ilaat tassaavoq katsorsartikkaluarlutik imigassamik aalakoornartortalimmik pinngitsuuisinnaajunnaaqqittartut ikigisassaanginnerat, taakkulu immikkut iliuuseqarfigineqartariaqartut ATASSUT-mit isumaqarpugut, taamaammatt Naalakkersuisut ilaqutariinnik meerartalinnik salliuutitsiniarnerat pissusissamisoortutut aammalu tapersorsorneqartariaqartutut nalilerparput.

Naak massa siunnersuummut siullermut, tassalu Inatsisartuni ilaasortap Agathe Fontain-ip siunnersuutaanut Naalakkersuisut akuersaartoqannginnissaannik inassuteqaraluartut paarlattuanillu Inatsisartuni ilaasortap Mimi Karlsen-ip siunnersuutaannik allannguutissamik siunnersuuteqarnikkut ingerlatitseqqittoqarnissaannik Naalakkersuisut inassuteqaraluartut ATASSUT-mit



ATASSUT INATSIARTUNI

kissaatigissavarput siunnersuutit marluutillugit Inatsisartut Ilaqutariinnermut Peqqissutsimullu
Ataatsimiititaliaannut nalilersugassanngortillugillu suliassanngortinneqassasut.